

24.5.2022  
6-96

Тоқтар ЗІКІРИН




# КӨНДІЛ КӨКЖИЕК ТЕРІ



**Тоқтар ЗІКІРИН**

# **КӨҢІЛ КӨКЖИЕКТЕРІ**



**Алматы  
«Асыл кітап»  
2009**

УДК 82-1  
ББК 84 (5 Қаз)-5  
С 96

Зікірин Т.

**3 96** Көніл көкжиектері. — Алматы:  
«Асыл кітап» баспасы, 2009. — 144  
бет.

ISBN 978-601-7184-07-0

«Көніл көкжиектері» - есімі жыр сүйер қауымға жақсы мәлім ақын Тоқтар Зікіриннің екінші жыр жинағы. Қырық жылдан бері ұзбей жыр жазып, өлеңдері студент кезінен бастап республикалық басылымдарда көптеп жарық көрген еліміздің солтүстік өңірінде тұратын ақынның бүл жинағына соңғы кездे жазған өлеңдері мен жастық шақ лирикалары және бірнеше балладары еніп отыр.

43233

УДК 82-1  
ББК 84 (5 Қаз)-5

3 4702250105  
00(05)-09

0) 2

ISBN 978-601-7184-07-0

© Т. Зікірин, 2009.  
© «Асыл кітап» баспасы,  
2009.

Северо-Казахстанская  
областная библиотека  
им. С. МУКАНОВА

г. Петропавловск

Осы өлеңдер жинағымды  
өмірден қыршын кеткен  
әкем Нұрахмет Зікірилұлы  
мен марқұм анат Рахил  
Жүзенқызына арнаймын.

*Бірінші бөлім*

## **ҰШҚЫР УАҚЫТ АҒЫСЫ**



## ҰЛЫ ЖОЛ АСТАНАДАН БАСТАЛАДЫ

Ғасырдың арқалаған жаңа арманын,  
Кім көрген он жылда елдің жаңарғанын.  
Қайсар халық қолының жеткені көп,  
Көз тігіп қарап отыр ғалам бәрін.

Биігі алған барлық досқа мәлім,  
Жасампаз жарқын істен хош табамын.  
Әлемге танытты елім өзін ерек,  
Кешегі тойында өткен Астананың.

Қазақтан шебер аспай салар қала,  
Ғажайып шаһар тікті жон арқаға.  
Жерүйік орнайды деп кім ойлады,  
Аңызғақ желге күйген Сарыарқада?

Қонақтары тамсанып, таңырқаған,  
Көркейіп кетті-ау осы тәнір қалам.  
Көңілдің көгершінін көкке ұшырып,  
Шаттанып шырқады ғой жаңа үрпақ ән.

Құрметтеп еркін өскен тұз тағысын,  
Алғыс айтып дастархан, тұз дәмі үшін.  
Сойлеғен той қонағы елбасылар,  
Жасыра алмай отырды қызғанышын...

Қызғандыра алсақ біз басқаларды,  
Болғанымыз шығар-ау достар алды.  
Елу елдің қатарына қосылар  
Ұлы жол Астанадан басталады.

## **ЖЕРҮЙЫҚТЫҢ КІНДІГІ**

Өзіңсің ғой, Астанам,  
Шаңырағы елімнің.  
Жаңа жолға бастаған,  
Тұғырысың сенімнің.

Келбетіңе тамсанам,  
Жайнаі түскен бұл күні.  
Бабаларым ансаған,  
Жерүйықтың кіндігі.

Сар даланың самалың  
Еркін жұтып, нәр алған.  
Күмбезіндей даланың,  
Құс қиялдан жаралған.

Көк Есілге келбетің  
Жарасатың, сұлуым.  
Жақындағы ел шетін,  
Бердің жүрек жылуын.

Қалай ғажап өрілдің,  
Інжуісің жаһанның.  
Жастарына елімнің  
Арман қала атандың!

Әлемдегі асылға  
Айналып сен барасың.  
Мына жаңа ғасырға  
Тауып ғажап жарасым!

## ЕРКІНДІК ІЗДЕП ӨСТІК

Бодан болдық,  
Отарлық күн де кештік,  
Жарты халық жат жұрттық тілге көштік.

Бір тәубесі – құл болып көргеміз жок,  
Даламыз кең,  
Еркіндік іздең өстік!  
Хандық құрдық  
Жұз бенен руға бөліп,  
Батырлықты мұра қып, туға берік.

Атан қомы, ат жалы дегендейін,  
Жорық жолда жалындан туған едік!  
Хат жүзінде болғанмен бағынышты  
Еркін халық намысы, ары күшті.  
Иілмеген иір емен бұтағындаі  
Күн көшпеген өзгеге жалынышты.

Даласы кең, ақселеу даласы кең,  
Топырагы қан жұтқан жарасына ем...  
Қазақ керуен келеді аман өтіп,  
Ғасыр жолдар, шыргалаң арасымен.

Ақ сақалды қария абыздарын  
Тындал өсіп, шежіре, аңыздарын,  
Көкіректе шер қатса, тоңы жібіп --  
Мейірімге женгізген жан ызгарын.

Желтоқсанда бодандық торын үзді,  
Таңтық ақыр бостандық жолымызды.  
Мақтан ете аламыз, мақтан ете  
Егеменіді, тәуелсіз елімізді!

## ҚАЗАҒЫМДЫ БИІК КӨТЕР

Далам байтақ, жаным дарқан, азатпын,  
Еркіндікті серік еткен қазақпын.  
Көк байрақты қокке биік көтердім,  
Болашақта болуы үшін ғажап күн.

Қыран құсынын,  
Арыстанмын, айбаттын,  
Үлгісімін ар-намыстың, қайраттың,  
өзгелерге өр ісіммен танылып,  
дос құшақты кең әлемге жаймақпын.

Керек болса көк сауыттың, наизамын,  
Құдай берген ой жағын да, бой жағын,  
Қазағымның құдіретін таниды  
Кең еліме көз алартса қай залым.

Бірақ мені кекке, оққа салмағын,  
Бейбітшілік, таныштық қой арманым.  
Көкіректе көк запыран тұнса да,  
Алғы күннің асыл өнін толғадым.

Сенгесін де келер күнге, ергенге  
Ұмтыламыз орны бөлек кең төрге.  
Елім менің отыргандай үй тігіп,  
Көз жасынан құйіп кеткен өртөнге.

Жаңа ғасыр меже ғасыр, бел ғасыр,  
Сенім деген қасиет бар менде асыл.  
Бағыт-бағдар дұрыс болып бүгінгі,  
Қазағымды биік көтер, белге асыр.

## ТҮНҚЫШ ПРЕЗИДЕНТИМЕ

Ел бағына туган жан-ау бұл кісі,  
Сөзі менен қабысатын нұрлы ісі.  
ТМД-ның төнірегінде бірлікті,  
Ту көтерген президенттің түнқышы.

Бағымызға бергенін-ай құдайдың,  
Ақыл кені шалқып жатқан бір айдын.  
Жас елімнің болашағы үшін де,  
Елбасымның амандығын сұраймын.

Қарапайым өскен жан-ды кеншіден,  
Жан таппаймыз осы құні кемсіген.  
Елбасының енбегі деп білген жөн,  
Озып кетсек маңайдағы көршіден.

Сөйлем кетсе есе бермес ешкімге,  
Жорғадайын тайландаған қос тілде.  
Бүкіл әлем санасатын онымен,  
Бір мәрггік бар, жарасады кескін де.

Мақсат қойған бар ісінен өте нық,  
Көре алмайды ешкім, сірә, қателік.  
Жылма-жылғы Жолдауымен жұртымды  
Бір белеске тастады гой көтеріп.

Тау көтсрген дерсің оны Толағай,  
Жаны таза мөлдіреген баладай.  
Ел ырыздығын тасытқысы келеді,  
Жұртының бұл жұтағанын қаламай.

Менменсіген Батысына алдырмай,  
Қара Қыттай жағын да ұмыт қалдырмай,  
Ел тануда, дос табуда, шіркін-ау,  
Шашасына келеді шаң шалдырмай.

Негкен білік, қандай ойлы тереңдік,  
Болашаққа жол бастаған сенерлік.  
Тұңғыш менің Президенттіммен келер ғой  
Қазағыма қол жеткізер кемелдік!

## НҰР ОТАН

Мағынасын алған ойлы тереңнен,  
Ел мұратын мақсат етіп кемел, кең.  
Партиямыз “Нұр Отан” деп аталған,  
Отанымыз нұрлы болсын дегеннен.

“Алаш” жетпей арман етіп аңсаған,  
Ұлы жолда қыршын көтті қанша адам?!  
Бар қазақты бір тілекке үйітқан,  
Бодандықтан қажып, жүден шаршаған.

Сол “Алаштың” немересі бүгінгі,  
“Нұр Отаным” болсын дейік ғұмырлы.  
Ешкім енді шайқалта да алмайды  
Елбасымыз өзі орнатқан тұғырлды.

Үлгі болып өзгелерге бірлігі,  
Бүкіл әлем таныды оны бүл құні.  
Әр жүректі болашаққа сендірген,  
Кең далама тарап жатыр нұрлы үні.

Аясында жастар қаққан қанатын,  
Шамиырағы сөнбей мәңгі жанатын.  
“Нұр Отаным” — менің нұрлы үмітім,  
Бар халықтан терең қолдау табатын!

## ТУҒАН ЖЕР

Мәңгі жырлап келемін, бір күн емес,  
Күнім жоқтай бұл менен жыр тілемес?!  
О, туған жер, қымбаттым, сенер болсан,  
Сені мениң сүймеуім мүмкін емес!

Жүрек мына туда егіз өзіңменен,  
Егіздерде сүю бар, сезімменен.  
Ең бірінші көргенім — **көң** аспаным,  
Тырбанғанда тірегім — сені іздеңем...

Өмір жолым басталып “тәй-тәй-лаған”,  
Ең бірінші жылаған, айқайлаған...  
Туған жерің ыстық-ау, бірақ соны —  
Күйкі тірлік қөшінде байқай ма Адам?

Кейбіреулер жан тыш жай керек дер,  
Мен айттар ем, ал досым ойды елең көр...  
Бақыттырақ сияқты жұз жыл тұрып,  
Туған жерде құлаған бәйтеректер.

Туған жерім — қазығым оралатын,  
Туған жерге гүл болып жарал, ақын!  
Кіндік қаным тамған жер —  
ең қымбаттым,  
Ошағында лаулатып жағам отын!..

## АТА ДӘСТҮР ҚЫМБАТ

Ата дәстүр мықты еді гой салты нық,  
Бірте-бірте бара ма осы сарқылып?  
Ауылдағы ағайындар үйінде  
Қымыз емес, ұсынып жүр жартылық.

Кейбір жастар көрсетпейді кішілік,  
Ағаларға төрден орын ұсынып.  
Жастық әкеп тастанайды өжейге,  
Келіндері қабағынан түсініп.

Тұрмыс түзік, өсті ауылдың малы да,  
Құрт, ірімшік бермес бірақ табыла.  
Айран емес, көже де емес ашыған,  
Қазіргілер сүтке құмар жабыла.

Қазақ деген атқа балап қанатын,  
Жалғыз атын бәйгеге бір салатын.  
Сол жарыстар көзден ұшты, жоқ күрес  
Көгалдағы көк шөптө ізі қалатын...

Көксемеймін көнені де, ескіні,  
Бүгінгі ауыл артық айтсам, кеш мұны.  
Маған қымбат – біздің ата дәстүрдің  
Бүгінгімен жарасымды кескіні.

## АБАЙ

Абай деген, қазақ деген – бір үфым,  
Екеуі де жүректегі тұннығым.  
Қазақ қайтіп, қазақ бола алады,  
Ту қып осы көтермессе бір ұлын?!

Сөз маржанның, ой маржанның данасы,  
Кеменгері, көзге тұскен сарасы.  
Абай жалғыз Құнанбайдың ұлы емес,  
Бар қазақтың, алты Алаштың баласы.

Алып десен – алыпқа да келеді,  
Жарық десен – жарыққа да келеді.  
Бар қазақтың көзін ашқан данышпан –  
Абай деген дарияның тереңі!

Асыл сөздің асып туган алыбы,  
Ашылмаған өлі жұмбақ дарыны.  
Әмсө әлемді тамсандырып келеді,  
Шыңғыс таудың шыңға шыққан нар ұлы.

Би-болыстап биік қойып бір басын,  
Шен-лискеппинен алас ұстап тұлғасын.  
Сонау алыс алмағайып заманда –  
Абай деген жанып өткен жыр-жасын.

Төлім менен тәрбиеге басып мол,  
Ұриагына көрсеткен ол ашық жол.  
Әмірдегі мәнді ұранға айналды,  
Абай айтқан: “Бес нәрсеге асық бол!”

Дарының да, таланттың да, білімің,  
Үлгі бізге мағыналы ғұмырың.  
Сен биікте тұрсаң – қазақ биікте,  
Абай ата, биік болсын тұғырың!

## ҚАСИЕТТІ ДОМБЫРА

Жанарымды жандыра,  
Құмарымды қандыра,  
Құмбірлетпі, күй төкші,  
Қасиетті домбыра!

Айтып бүгін өскенін,  
Қосылғанын көшке елім.  
Тасқындарып жеткізші –  
Қасиетті қос шегім.

Көзін ашып дарынның,  
Бағдары боп бағымның,  
Дүбірлетші даламды –  
Тұлпарлардай арындым.

Қанында бар қазактың,  
Дауылдасын азатты үн.  
Тау сүйндай тасқында –  
Сағағында шанақтың.

Атадан қалған мол мұра,  
Шертілмесе, сол құнә!  
Құмбірлеші, күй төкші,  
Қасиетті домбыра!

## ШАБЫТ ТІЛЕУ

Жогалтқасын ба барымды көп,  
Ой келмеді-ау ілкі мұлде.  
Мен отырмын жаным жүдеп,  
Қараңғы тұн кірпігінде...

Тұн жамылған ғарыштағы,  
Тылсым әлем әуресі ме ед?  
Жымындаған алыстағы  
Жұлдыздардың сәулесі жоқ.

Ай да бүгін тумағасын ба,  
Қап-қараңғы жүректе үрей.  
Арпалыс туды бір қара басымда,  
Асау шабыт тілеп дүлей...

## АУЫЛДЫ АҢСАУ

Ұлымын жусан даланың,  
Сүйемін қияқ, гүлін де.  
Жұтар ма ем салқын самалың,  
Шыжыған шілде күнінде.

Ауылға қазір жетер ме ем,  
Қына жолды қиялап.  
Сағымнан желкен көтерген,  
Қандай ыстық ұя – бақ.

Достармен ескі табысып,  
Ойнар ма ем көген-көгалда?  
Бала күнгідей жарысып,  
Шаттыққа көніл толар ма?

Қонырысып жетер ымыртта,  
Тұтін иісі қостағы.  
Асаудай тұспес құрыққа,  
Бәрі де есте жастағы.

Батады балқып шілде күн,  
Сүт сауымдай түні бар.  
Аңсаған ауыл нұр демін,  
Жанымды менің кім үғар?

\* \* \*

Ауылда қазір шілде күн,  
Бақ-бақ басы ұлпілдек.  
Аптаптың ыстық нұр демін,  
Көл жұтады біргіндеп...

Самал жоқ қырдан есетін,  
Қайыңың сипап балтырын.  
Мамырлап көктен көшегін,  
Бұлғтарым қайда балқыдың?

Қиялды қырға сыйдырып,  
Көгілжім сағым бүркей ме?  
Ыстыққа қанат құйдіріп,  
Үшпайды-ау шыбын-шіркей де...

Жібі бос қазір желінін,  
Құлын-бие байланбай.  
Құннің қызу көрігін  
Далаға үрлең қойғандай...

Осынау жайды, күйді ұғып,  
Кезі болса да сауынның,  
Көл басында үйлігып,  
Табыны жатыр ауылдың...

Шыжыған аптап ішінде,  
Тымырсып тұрган өлемім.  
Осы бір сәтің үшін де,  
Сағынып саған келемін.

## БАБАЛАРЫМ ІЗІ БАР

Дүниені дүрліктіріп, сіліккен,  
Өтті адамзат талай қырғын-сұріктен.  
Өзін таза ұлтқа санап жүргендер,  
Білмейді ғой туғанын жат сілдіктен.

Жарты әлемде ойран салған тағылар,  
Ағзасында жат жусасы табы бар.  
Ақсүйекті ағылшынның өзінен  
Мүмкін Шыңғыс қаны бары табылар?!

Батыс елдер бөрі илеген жатырлы,  
Бауырына басты талай жат ұлды.  
Мына орыс та өз ұлына балады  
Бүйра шашты, тегі қара ақынды.

Айта берсе мұндай мысал көп, тегі,  
Мадиярлар бізден қалай шеттеді?  
Қаны бірге сар даланың ұланы,  
Небір заман венгр болып кеткелі.

Әуел баста табынғамыз Күнге біз,  
Ізімізді Батыс шардан ізденіз.  
Жауларының кекіл шашын олжа еткен,  
Аңтектен де алыс емес іргеміз.

Ку даланың қаңбактайын кезбесі,  
Америка ашылмаған кезде осы,  
Аляскаға бұғаз басып бұғымен,  
Откенін де мүмкін екен сезбесі...

Ұшқыр қанат берген осы нар даlam,  
Бабаларым бармаған жер қалмаган.  
Ыстық қанды Адайлардан құралиған,  
Мамлюктердің ерлігіне таң қалам.

Мақтан болған перғауындар елінде,  
Бейбарыстың ерлік ісі тегін бе?  
Дүниеде із қалдырган сияқты,  
Бабаларым аттың суық терінде.

Олай болса бізде туыс көп тегі,  
Аталардан қалған алыс шеттегі.  
Сар даланы басып жатыр баурына,  
Таза қазақ болып қана кеткені!!!

## КӨШКЕНҚӨҢДІ САҒЫНУ

Не жетеді дейсін бұл өскен жерге,  
Жатғық әсте жасамас еш пендеге.  
Шөп шабуышы ем анама серік болып,  
Шілде айында жыл сайын Көшкенқөндө.

Көшкенқөндө ақ қайың аралы бар,  
Жұпар иісі аңқыған самалы бал.  
Бүлдіргенді бәктері қандай еді,  
Шақыратын жазда осы баланы бар...

Көз алдында әлі сол гүлді белен,  
Ақселеуі үлпілден үлбіреген.  
Қына беткей егіске жақын жерде  
Көк билеміз оттайды құлныменен.

Шабындыққа жеткен соң күн ысымай,  
Жараса ма жаңға бұл тұрысы жай.  
Қылышылдаған шалғымен жонышқаның  
Сусылдатып аламыз тынышын-ай...

Жұтқасын ба нұр қала таң самалын,  
Есімде жоқ бірде-бір шаршаганым.

Анама еріп өзімше мен де мына  
Жас балауса көк шөйттөн жол саламын.

Бағым еді-ау жан анам мандаудағы,  
Сағынышым сарғайып солмайды әлі.  
Қоста берген шайының қаймақ қосып,  
Таңдаудынан кетпейді балдай дәмі.

Болмаса да алыстап, көшкенге мін,  
Қарыздармын өзіңе, өскен жерім.  
Көзіндегі боп көрінетін анамның,  
Сағынамын мен сені, Көшкенкөнім!

## ЖЕЛ ДИЕРМЕН

Зырылдауығы қебінде  
Үп еткен желді үйірген.  
Шойманың қырқа дөнінде  
Бар еді жел диермен...

Астық артып албар жақ,  
Жел тұрса жетер асығып.  
Қозғалған диермен қалбаңдал,  
Шықырламауы үшін тас үгіп...

Әбігер етер барлығын,  
Ол жерде тер ғой өтелген.  
Бала да құшті, шал мығым,  
Арқалаги бидай көтерген.

Бәрі де қимыл жасайды,  
Белін жазбай бір ұдай.  
Тістерін тастың қашайды  
Диерменші шал ыбырай.

Сөтін салса тез өткен,  
Дән құйылар біртіндеп.  
Айналған шарлы өзектен,  
Ұн ағады үлпілдеп...

Желдің жойқын күшімен,  
Қара тастар дөңгелеп,  
Диірмендегі ісімен  
Нанын тапқан елде көп.

Ұмытам қалай оны мен,  
Неге оны болған жоқ дейін?  
Қырданың қия жолымен,  
Сол жерге соқпай кетпейім.

Қайтіп ойды түйіндермін,  
Қырқаны баспай ең биік?  
Шоймандағы диірменнің  
Тастары жатыр денқиіп...

## АЙЫРШЫ

Есіме алдым науқанды шөп тасылар,  
Атқаратын ауыл үй топтасып әр...  
Қазір шілде – шөп науқан, бірақтағы  
Дәл Қабдолдай айыршы жоқ та шығар?

Болмаса да алпауыт дойыр денен,  
Қабдол аға-ай, өзінді шойын дер ем.  
Әперуші ең бір түйреп шөмелені,  
Үш салалы ашамай айырменен.

Қызыл қайың сыр бермес бұратылмай,  
Сықырлайтын сабы оның сынатындей.  
Жапырып шөп әперіп тастаушы едің,  
Бір өзің үш жігітке тұратындей.

Неткен күш, неткен қайрат белде мығым,  
Біріне ессе бермес елдегінің.  
Қанат жайып қайқайған машиналар,  
Татымына тұратын еңбегіңің.

Тамсандырған осылай дала жұртын,  
Болмауыш еді ісінде ала бір күн.  
Отыруыш ең дем алыш сосын бір кез,  
Шалап шалған жылтырап қара мұртын...

...Қол шалғымен қазір шөп шабылмайды,  
Болып алды комбайн көп ыңғайлы.  
Бүгін қанша ауылдан іздесsem де,  
Дәл өзіндей айыршы табылмайды...

## АУЫЛДАҒЫ СОҢҒЫ АРАЛЫМ

Бөрімізге кең тыныс, жайлау дала,  
Құлазиды-ау деп қыын ойлауға да.  
Ат тірейтін достардың ішіндегі  
Ауылдағы қалғаны Сайлау гана!

Көшіп кетті құші бар әлділері,  
Қалған жүртқа қалайша сөн кіреді?  
Бықсытың жүр біреулер, ауылдың бұл  
Болашағы жоқ деген әңгімені...

Қалаларға толатын көшіп елі,  
Урбанизация деген-ау осы ма еді?  
Бесік жерден безбейтін аталарым,  
Қалай бізді енді ғой кешіреді?

Болжап бәрін білді кім күн ілгері,  
Қыын болды-ау ауылдың бүлінгені.  
Құлаққа үрған танадай тып-тыныш қой,  
Бие ағытар кез мына іңірдегі.

Құлын даусы шықпайды шүркыраған,  
Саумал іісі ол да жоқ бүркыраған.  
Тоз-тоз болып күн жеген ши ағаштан,  
Жиып алған сияқты құртын анам...

Таңға дейін сауығы басылмаған,  
Жогалтқандай ауылын асыл далам.  
Құлазиды-ау, қөнілім, құлазиды,  
Жанға батар шындығын жасырмадан.

Құндағының құрғап бұл кеткенінен,  
Бала азайып барады мектебінен.  
Ендігінің арманы ауылда емес,  
Қалалы жер қиянда, шетте білем?

Бірақ соның бірін де елең етпей,  
Көшкен елдің соңынан ере кетпей,  
Тоғыз бала туғызған әйелімен  
Сайлау отыр мұзғымай, керемет қой!

Кіреді деп өмірдің сәні қай күн,  
Берілмейді бей-бекер бәріне ойцың.  
Байлап-матап қойғандай оны осында,  
Туған жері атасы Мәлібайдың?!

Тағатына мен оның таң қаламын,  
Басқа жерге құптаімын бармағанын.  
Көшкін өмір көшінде табан тірер  
Сайлау ғана сияқты соңғы аралым!..

### МЕНИҢ МҰҒАЛІМДЕРІМ

Оңғарды ма әу баста құдай жолды,  
Ұстаздарым ығай мен сығай болды.  
Балуаниң мектебіне сол жылдары  
Шұғылалы шіркін-ау шырай қонды!

Өтетүгүн бірінен бірі қандай,  
Көрінетін біздерге ұлылардай.  
Салыстырып байқасам осы күні,  
Қазіргінің барады-ау құны қалмай...

Бастауышта Қажыттай, Науша ағайым,  
Танитүғын баланың жан сарайын.  
Құлағымнан кейде бұрап алса да,  
Алақанын ал қалай аңсамайын?

Екеуі де от кешкен жауынгер-ді,  
Жаныменен сүйетін ауылды-слді.

Ән салғанда біздерді еліктіріп,  
Ал, білімнің таусылмас тауын берді.

Істерінің болмайтын әсте кемі,  
Мектебіміздің бар еді қос Шәкені.  
Шәкен ағай шым-шытырық есептен  
Жаңылып көрген емес еш те тегі!

Шәкен апай – ол дағы кемел еді,  
Тұла бойы тұнған бір өнер еді.  
Сурет салып, орысша сөйлегенде,  
Алдына жан салмай-ақ желер еді.

Майдангерлер шықса да елден ғой көп,  
Соғысты дәл Нәбидей көрген ғой жок.  
Желдей есегін жағрапия сабағында,  
Жаһанды өзі кезіп келгендей боп...

Солар берген білімнің арнасы кең,  
Мектебім, талай биік өрге асып ең,  
 Тағы сенің ғұлдеген кезің болды,  
Нұржан, Қоқай, Есмағұл жалғасымен.

Қалірлейді асылды барында кім,  
Сейтен еді-ау ұйытқан соның бәрін.  
Түседі еске, шіркін-ау, түседі еске,  
Сузып бара жатқанда қолындағын...

Жағып берген өшпейтін шырағымды,  
Аршып берген қайнарлы бұлағымды,  
Кездестірген еместін содан бері  
Дәл солардай тамаша мұғалімді!